



PERUTUSAN
SEMPENA HARI RAYA AIDILFITRI 1438 HIJRIAH
KOMISIONER JENERAL PENJARA MALAYSIA

BISMILLAHIRAHMANIRAHIM

Assalamuaikum Warahmatullahi Wabarakatuh dan Salam Aidilfitri

**Allahuakhbar, Allahuakhbar, Allahuakhbar, Allahuakhbar, Allahuakhbar,
Allahuakhbar, Allahuakhbar Walillahilhamdu,**

Segala puji-pujian dirafakkan ke hadrat Allah SWT, kerana dengan limpah kurniaNya, kita dapat meraikan Sambutan Syawal yang mulia 1438 Hijriah dengan suasana penuh kemeriahan. Bersama-samalah kita berdoa agar Ramadan yang kita lalui ini mendidik jiwa kita menjadi insan yang bertaqwa dan bersyukur di atas nikmat yang telah diberikan di samping kita terus istiqamah dalam melaksanakan amanah yang diberikan.

Saya mengambil kesempatan ini ingin mengucapkan Selamat Hari Raya Aidilfitri khasnya kepada warga kerja Jabatan Penjara Malaysia serta seluruh muslimin dan muslimat. Jadilah hamba Allah SWT yang berjiwa besar dengan membuka jendela kekeluargaan dan persahabatan seluas-luasnya dengan mengambil kesempatan ini

untuk kita saling bermaaf-maafan, ziarah menziarahi, dan mengeratkan lagi persaudaraan sesama kita. Kebersatuan dan kesetiaan wajar menjadi pegangan dan diharapkan permuafakatan yang telah terjalin ini akan menjadi tunjang kekuatan kita untuk terus bersatu di dalam apa juga situasi terutamanya mendepani cabaran yang mendatang.

Firman Allah yang bermaksud:

"Berpegang teguhlah kepada tali Allah, janganlah kamu berpecah belah dan ingatlah kamu akan nikmat yang dikurniakan Allah kepada kamu".(Surah Ali-Imran, ayat 103)

Menyambut syawal yang menjelang tiba, saya menyeru kepada seluruh kakitangan yang bertugas memastikan jaminan keselamatan Penjara Malaysia berada di tahap yang tertinggi dan terbaik. Kesiapsiagaan kita penting bagi mengelakkan perkara yang tidak diingini berlaku terutamanya di dalam tempoh sambutan perayaan. Tugas ini merupakan satu amanah negara yang mesti kita pikul dengan sebaik-baiknya demi memastikan keharmonian serta kesejahteraan rakyat pada keseluruhannya akan terus terpelihara.

Bersempena sambutan syawal kali ini, Jabatan Penjara Malaysia telah menetapkan hari raya ketiga dan keempat bagi tarikh lawatan seluruh keluarga penghuni. Saya menyeru kepada keluarga ambillah kesempatan ini untuk menziarahi mereka yang ditempatkan di sini. Sesungguhnya kedatangan keluarga amat dinanti dan dirindui. Jangan biarkan

tembok penjara menjadi penghalang untuk terus mengeratkan hubungan kekeluargaan. Ambillah kesempatan ini untuk memaafkan mereka, ibarat perumpamaan **“air dicincang tidak akan putus”**, begitulah seharusnya ikatan kekeluargaan walaupun dipisahkan oleh tembok batu.

Pesanan saya kepada warga kerja yang akan pulang ke kampung agar memandu dengan berhemah dan didoakan semoga selamat dalam perjalanan menuju ke destinasi masing-masing. Sambutlah Hari Raya ini dengan penuh kesyukuran bersama insan-insan tersayang.

Akhir kata, saya, isteri dan keluarga dengan tulus ikhlas mengucapkan selamat menyambut Hari Raya Aidilfitri, Maaf Zahir dan Batin kepada seluruh warga kerja Jabatan Penjara Malaysia serta muslimin dan muslimat yang di kasihi sekalian.

Syawal dinanti penuh kerinduan

Jangan dilupa pada yang serba kekurangan

Sambutlah syawal dengan penuh kesyukuran

Semoga dikurniakan seribu keberkatan

Ingatan Tulus Ikhlas,



(KJP DATO' SRI HAJI ZULKIFLI BIN OMAR)